



Pranuar / Dorezuar Prinjeho/Prodato Received/Delivery		12.12.2023	3 viti god year
Organ /Njesia Organ /Jedinica Org./Unit	Nr Prot B: Prot Prot No	Shtojca Prilog Appendix	Sasia Kolicina Quantity
SPK/NSHCK	7429/2023		1/4



Republika e Kosovës
Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVA

A.Nr.1358/2023

Këshilli i Pavarur Mbikëqyrës për Shër' imin Civil të Kosovës-Kolegji për Shqyrtimin dhe Vendosjen e Ankesave i përbërë nga: Eshref Shabani-kryetar, Jeton Koca dhe Ardit Haxhnikaj Demi-anëtarë me Çlirim Zeka-Zyrtar i Lartë për Bashkëpunim Profesional në cilësinë e procesmbajtësit, kanë shqyrtuar ankesën me numër A.nr.1358/2023 të datës 31.10.2023, të parashtruar nga ankuesi _____ me adresë rr. "Ali Pashë Gucia" nr.8 Komuna e Mitrovicës së Veriut, kundër organit të punësimit Komunës së Mitrovicës së Veriut, në çështjen juridike "Shkelje e të drejtës në pagë", duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3, nenin 18 paragrafin 1 nën paragrafin 1.8 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datën 12.12.2023, mori këtë:

V E N D I M

Këshilli i Pavarur Mbikëqyrës për Shërbimin Civil të Kosovës, shpallet jo kompetent për të vendosur lidhur më ankesën A.nr.1358/2023 të datës 31.10.2023, të parashtruar nga ankuesi _____

Lënda i dërgohet për shqyrtim dhe vendosje organit kompetent/Komisionit të Ankesave për Nëpunësit e Shërbimit Publik të Komunës së Mitrovicës së Veriut.

A r s y e t i m

Ankuesi _____, i punësuar në Institucionet arsimore në territorin e Mitrovicës së Veriut sipas Kontratës punës për kohë të pacaktuar të datës 01.05.2018 në pozitën e punës "Mësues Edukator", me datë 31.10.2023 ka parashtruar ankesë me numër protokolli 6783/2023 në Këshillin e Pavarur Mbikëqyrës për Shërbimin Civil të Kosovës, me pretendimet ankimore lidhur me mos ekzekutimin e pagave qysh nga muaji Korrik 2023.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 07.11.2023 ka dërguar kërkesën për përgjigje në ankesë tek Komuna e Mitrovicës së Veriut, ndërsa Këshilli më datë 16.11.2023, ka pranuar përgjigje në ankesë nga Komuna e Mitrovicës së Veriut, me shkresat e bashkangjitura të lëndës.

Kolegji për Shqyrtimin dhe Vendosjen e Ankesave, ka administruar këto prova: Ankesën me numër protokolli 6783/2023 të datës 31.10.2023 të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; E-mail nga G.Q. për ankesa.kpmschck@rks-gov.net i datës 30.10.2023; E-mail nga ankesa.kpmschck@rks-gov.net për G.Q. i datës 20.10.2023; E-mail nga G.Q. për ankesa.kpmschck@rks-gov.net i datës 20.10.2023; Kërkesë nga D.Ç. për organin kompetent me numër protokolli 663/031 i datës 04.08.2023; E-mail nga C.Z. për L.F. i datës 07.11.2023; Kërkesë për përgjigje në ankesë i datës 07.11.2023; E-mail nga L.F. për C.Z. i datës 13.11.2023; Përgjigje në ankesë i datës 16.11.2023; E-mail nga L.F. për C.Z. i datës 15.11.2023; Kontratë Pune për kohë të pacaktuar e D.Ç. i datës 01.05.2018;

Kolegji për shqyrtimin dhe vendosjen e ankesave, duke shqyrtuar të gjitha provat e lëndës, konstaton se Këshilli i Pavarur Mbikëqyrës për Shërbimin Civil i Kosovës, **nuk është kompetent për të vendosur për ankesën e parashtruar nga ankuesi** , **sepse:**

Kolegji për shqyrtimin dhe vendosjen e ankesave ka konstatuar se bazuar në shkresat e lëndës ankuesi është i punësuar në Institucionet arsimore në territorin e Mitrovicës së Veriut sipas Kontratës punës për kohë të pacaktuar të datës 01.05.2018 në pozitën e punës "Mësues Edukator".

Kolegji i Këshillit i'u referua fillimisht dispozitave të Ligjit N.08/L-197 për Zyrtarët Publik përkatësisht me nenin 5 paragrafin 3 ku është përcaktuar se; 1. Kategoritë e zyrtares/it publik janë: 1.1. Nëpunësja/i i shërbimit civil; 1.2. Nëpunësja/i i shërbimit publik; 1.3. Krijuesja/i dhe performuesja/i e/i artit dhe kulturës; 1.4. Nëpunësja/i teknik dhe mbështetës; dhe 1.5. Zyrtarja/i i kabinetit... 3. Nëpunësja/i i shërbimit publik është zyrtarja/i publik i cili ofron shërbime publike të drejtpërdrejta për qytetarët në fushën e arsimit, shëndetësisë, kulturës, artit, në fushën e mjekësisë ligjore, si dhe shërbime tjera të ngjashme publike. Nëpunësja/i i shërbimit publik ushtron detyrën në pozitën përkatëse duke filluar nga niveli profesional deri në nivelin e lartë drejtues. Nëpunësja/i i shërbimit publik është edhe nëpunësja/i i shërbimeve të brendshme në administratën e shërbimeve publike pjesë e administratës shtetërore, në administratën e shërbimeve publike apo pjesë e komunës, rrjedhimisht në kuptim të këtyre dispozitave ligjore si dhe duke u bazuar në pozitën e ankuesit "Mësues Edukator" në Komunën e Mitrovicës së Veriut. Kolegji i Këshillit konstatoi se në rastin konkret pozita "Mësues Edukator" është e kategorizuar si nëpunës i Shërbimit Publik.

Në kuptim të nenit 101 paragrafi 2 të Kushtetutës së Republikës së Kosovës si dhe nenit 6 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, nuk është kompetent për të vendosur për ankesën e parashtruar nga ankuesi, sepse Këshilli është kompetent që të shqyrtoj dhe të merr vendime vetëm për ankesat e nëpunësve civil dhe kandidatëve për pranim në Shërbimin Civil.

Andaj duke pas parasysh konstatimin si më lartë se Këshilli i Pavarur Mbikëqyrës për Shërbimin Civil të Kosovës nuk ka juridiksion për të vendosur lidhur me ankesën me numër A.nr.1358/2023 të datës 31.10.2023. Kolegji i Këshillit duke u bazuar në nenin 75 paragrafi 1 të Ligjit Nr.05/031 për Procedurën e Përgjithshme Administrative vendosi që lënda ti dërgohet për shqyrtim dhe vendosje organit kompetent, në këtë rast Komisionit të Ankesave për Nëpunësit e Shërbimit Publik të Komunës së Mitrovicës së Veriut.

Kolegji për shqyrtimin dhe vendosjen e ankesave, pas konstatimit se Këshilli i Pavarur Mbikëqyrës për Shërbimin Civil të Kosovës nuk është kompetent për të vendosur lidhur me ankesën e ankuesit, udhëzon palën për ushtrimin e mjeteve juridike bazuar në dispozitat e Ligjit Nr.08/L-197 për Zyrtarët Publikë, përkatësisht nenin 77 paragrafi 1 ku përcaktohet se: 1. *Përveç kur parashikohet shprehimisht ndryshe në këtë pjesë të ligjit, marrëdhënia e punës për nëpunësen/in e shërbimit publik rregullohet sipas dispozitave të Ligjit përkatës të Punës, si dhe nenin 88 paragrafi 1 dhe 2 ku përcaktohet se: 1. Nëpunësja/i i shërbimit publik mund të ankohet kur pretendon se i janë shkelur të drejtat në marrëdhënien e punës. Të drejtën e ankesës e kanë dhe kandidatët në procedurë rekrutuese në shërbimin publik. 2. Ankesa sipas paragrafit 1. të këtij neni paraqitet sipas afateve të përcaktuara në ligjin për procedurën administrative nga dita e pranimimit të vendimit përfundimtar. Si dhe Ligjin Nr. 03/L-212 i Punës përkatësisht nenin 78 paragrafi 1 dhe 2 ku përcaktohet se: 1. I punësuar i cili vlerëson se punëdhënësi ka shkelur të drejtën e marrëdhënies së punës, mund të paraqesë kërkesë të punëdhënësi apo organi përkatës i punëdhënësit nëse ekziston, për realizimin e të drejtave të shkelura. 2. Punëdhënësi është i obliguar për të vendosur sipas kërkesës së të punësuarit, në afatin brenda pesëmbëdhjetë (15) ditëve nga data e pranimimit të kërkesës. Ndërsa me nenin 79 paragrafi 1 përcakton se: Çdo i punësuar i cili nuk është i kënaqur me vendimin me të cilin mendon se i janë shkelur të drejtat e tij, ose nuk merr përgjigje brenda afatit nga neni 78 paragrafi 2. të këtij ligji, në afatin vijues prej tridhjetë (30) ditësh, mund të inicioj kontest pune në Gjykatën Kompetente .*

Andaj pas analizimit dhe vlerësimit të të gjitha shkresave të lëndës, Kolegji për Shqyrtimin dhe Vendosjen e Ankesave, bazuar në nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.8 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, vendosi si në dispozitiv të këtij Vendimi.

Vendimi hyn në fuqi ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, Gjykatën Themelore në Prishtinë/ Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1358/2023

Çlirim Zeka

Procesmbajtës



Vendimi i dërgohet:

- Ankuesit
- Kryetarit të Komunës së Mitrovicës së Veriut;
- Komisionit të Ankesave për Nëpunësit e Shërbimit Publik të Komunës së Mitrovicës së Veriut;
- Udhëheqësit të Personelit të Komunës së Mitrovicës së Veriut;
- Arkivit të KPMSHCK-së.